

*~ KAKO SE NIKAL UČILO ~*



## *ENCI BENCI*

*Enci benci na kamenci,  
tri su brata u kredenci.  
Prvi viče DU-DU,  
ima ženu ludu.  
Skuhala je popare  
da se djeca opare.*



*Kuha baba puru,  
zove barba Juru,  
Barba Jure Jakova,  
Jakov zove svakoga!*



*-Dico moja, gledon kako ste lipo obučeni i spleteni, a mi smo ol vaših godišć imali tašelone gaće. A ušenok, da te Buog oslobodi! Nisi hi se nikako mogo deliberat. Pujali smo jedon drugoga na suncu, a i večer uz lampjun.*

*„Svi mi pujojte, svi mi pujojte!“*

*-Ni bilo vodie, a fameje s puno dicie...  
-Ako jedon don mater ide u nikoga na gustirnu ukalat vodie, dobro je, ali čo sutra?  
-Nismo imali ni letrike, ni majice, ni patike...*



*Puše bura iza kuće,  
tieško dici bez obuće!*

-Ko ti je zno za patike? Ma, ni mudanot ni bilo do rukie.

Kal bi mater oprola onie ča su bile na ditetu, a ne bidu se uspiale osušit, dite ti don ne bi ni išlo u skulu...



- Zašto ti Josipe jučer nisi bio u školi?

- Ma, uputi san se jo pul skule, ali kal san duošo do vaše kuće...dolo mi se pogledot...a na sušilu visidu vaše mudonte. Računo san da niećete duoć u skulu, po san se vroti doma.

- Nismo ni šakoću imali! Nikor ni imo šakoću!  
Somo bilježnicu pol ruku i pul skule... I to bos!  
Bosi smo hodili u skulu! I po zimi i po ledu...



*Puše bura iza kuće,  
tieško dici bez obuće!*



- Nismo imali ni dugaških goč. Somo krotke, do kolin, zimi i liti.  
A postolih nimo, hulahopih nimo...

*Puše bura iza kuće,  
Tieško dici bez obuće!*



- A ni svak imo ni vune za uplest kalcete.  
Vajalo je imat uovce.

- Da bi zarodi za kilo vune, otac je vajalo da rodi cili don.





- A kal bimo i duošli nikako do kalceti, nikima bi se pol kolina sve bilo popriščilo, po hi je vajalo zavrćot.

*Puše bura iza kuće,  
Tieško dici bez obuće!*



-Meni je prvie postole napravi Piengle, kal san se pričiesti. Njih san nosi za u crikvu, a u skulu je vajalo i daje hodit buos ili u oponcima.

*\*PLESKA, PLESKA*

*Pleska, pleska, tata gre,  
nosi molen postole  
i tičicu bez noge  
i kosića vranca,  
da po polju tanca.*

*Pleska, pleska, tata gre,  
nosi molen postole  
i crvene papuče,  
da po kući skakuće.*

*Tanculi, tanculi, moj Martin,  
jabuke su po šoldin,  
a naranče po dinor,  
da je Martin gospodor!*

*Skoči Martin u žardin,  
polomio ružmarin,  
ružmarin se zeleni,  
mali Martin veseli!*



- Nos je bilo četiri brata i sestra, po smo postole imali za nojstarijega, a uon hi je dovo nami kal mu otisnidu.

*Puše bura iza kuće,*

*Tieško dici bez obuće*



- Nismo imali ni škufije ko vi danas, a ni lumbrele. Dica su, grmilo, lampalo, hodila nanoge u skulu.

- Mi smo veće ol ure hodili do skule, 6 kilometrih, i tako nose. Sata nismo imali i nismo znali koja je ura. Kal vidiš di je sunce, olprilike krieneš, po kal duojdeš.



- Putien bimo se, ko dica, znali i zaigrat, po nismo znali ni jesmo zakasnili. Srića da su nan meštrovica bile dobre, po bidu nan oprostile.

### \* JA SAM MALA RUŽA

*Ja sam mala ruža,  
mamina sam kći,  
u našem mjestu  
poznaju me svi.*

*Kad u školu idem,  
svašta vidim tad,  
vidim kuće, polja,  
na vrh brijega grad.*

*Al je meni draža,  
od svih kuca tih,  
ona mala kuća  
gdje si majko ti.*

*Gdje je moja seka,  
do nje otac naš,  
a maloga bracu  
zibam sada baš.*



- Imali smo jednu dobru meštrovicu Kovačiku...



- Ajme, a smo zakasnili?

- Djeco moja, jeste li se uzimili?  
Dođite, dođite bliže peći.

**\*PAČJA ŠKOLA**

*Jeste ličili djeco?  
Vjerujte bez šale,  
otvara se škola  
za pačice male.*



*Učio ih, učio,  
od srijede do petka,  
al se nisu makli  
dalje od početka.*

*Svi pačići došli,  
kao đaci stoje,  
stari patak stavio  
naočale svoje.*

*Ništa više ne nauči  
pačurlija ta  
nego što je prije znala:  
Pa, pa, pa!*

- Mariendu nismo nosili. Ko će ti je dat, ol čega?

- Izutra bimo pomuzli kozu i popili malo mlika pri skule.

Dicie puno, mlika malo...

- A za kozuon je vajalo puoć, pri ili posli skule, kako je kuo mogo...





- I baraškode smo činili...



- Na Dubrovi je jedon čovik imo mlekinju. Mi bimo mu, ko dica, kal je zrilo i kal ni, pobroli smokve. Njemu to dodijolo, po jedon put napiso na stablo:  
„Ne diraj, otrovano!“  
Jo i prijatej nabroli mlekinj i ti put, koliko smo muogli. Če nojvažnije, nojpri smo hi doli kozi. Tili smo vidit hoće na njuon olgovorit...

Kal smo vidili da je ona dobro i da je navimola, najili se i mi sa nin će ostalo...  
A onda smo na drugu stronu napisali:  
„Otrov ne djeluje!“

*\*ANJULI BANJULI*

<i>Anjuli banjuli</i>	<i>kvanti šoldi</i>	<i>tre lemone</i>	<i>šiguli biguli</i>
<i>kontrabanjuli</i>	<i>vento tre</i>	<i>tre naranče</i>	<i>škampa fuora via!</i>
<i>di kolori</i>	<i>fiorentin</i>	<i>špor portare</i>	
<i>di lore</i>	<i>gvardelin</i>	<i>špicjarija</i>	

- U skulu smo nosili jednu bilježnicu i to je bilo dosta za polugodišće.  
Kal bi se bilježnica popunila, izbrisalo bi se i opet pisalo.

- Gumicu nismo imali, po smo brisali sa malo pupe ol kruha, ako je bilo...



- Doma nan ni imo kuo pomoć jer su roditelji bili puni posla, a većina ni znala ni čitat ni pisat, po smo se morali somi snalazit.

*\* POBILI SE FRATRI*

*Jedan, dva i tri,  
pobili se fratri,  
na crkvena vrata.  
Jedan drugog tuče  
i za bradu vuče.*

*Jedan drugom viče:  
„Pomozi mi striče!“  
„Kako ću ti pomoći,  
kad i mene tuku  
i za bradu vuku.“*



- U prvien razredu smo do polugodišća crtali kuose crte, a ol polugodišća drete.  
Tako smo trenirali ruku.



- Ko ti je držo olovku pri skule! Ni bilo finece,  
po smo znali i probit bilježnicu.  
A vite koliko ste vi danas pametniji... Ča vi  
sve učite i znote!

- Ma nemuoj mi ništa govorit! Zablenu san se kal san ću unuka, a bi je tek u prvien  
razredu, kako ponovjo:“ Kocka-kvadar-valjak-...“  
Judi moji! A mi smo se svo godišće borili sa crtima! Prvie dvi bidu još i bile  
koliko-toliko drete, a onie daje, ko da hi je bura obolila.

- A kal smo počeli učiti slova...



*Golub guče gu-gu.  
Gojko je dao gol.*


*Pećar Ćiro grad peći.  
Marica mu nosi u ćupu mlijeko.*

*\* PETICE*

*Iz škole kući Ana hita  
Za njom juri i Melita.  
Razlog za žurbu svima je znan,  
Tri petice u isti dan!*



- Onda ni bilo ni igrališta ni dvorane za gimnastiku. Na puortu je bi veli buor,  
po smo mi dica trkali ol skule do bora, ol bora do skule... I to ti je bila gimnastika!



**\* NA MUORU JABUK**

*Ovi govori: Na muoru jabuk.*

*Ovi govori: Homoća kupit!*

*Ovi govori: Kal nimomo piniez.*

*Ovi govori: Imo u matere pol posteju!*

*A vi govori: Jo san mami mili, drogi,*

*Jo ću mami ošpijat,*

*Meni će mama sisu dat!*

*Ćurlin, ćurlin, ćurlin!*




- I u ono doba, ko i danas, dica su činila prestave. Odlučilo se parićat Crvenkapicu...



- Mâ, i jo ću glumit!  
- Ajme, lipo! A ča ćeš govorit?  
- Ma nieću govorit, nego ću somo zavijat ko vuuuk, iza pozuornice.  
- Čo! E kal je tako, nieš ni puoć!  
Ako nieš zavijat na pozuornici, nieš ni iza pozuornice!

- U skulu se hodilo koliko je kuo mogo. Tieško se živilo, po su niki prikinuli skulu da bidu muogli pomoć roditeljima prihronit fameju. Muški su čuvali uovce, dovali ruku u gori ili kolo japjenic, a ženske su njin nosile spizu.



*\* OVČICE MALE*

*Ovčice male,  
po polju su pasle,  
cvijeće su brale,*

*Bogu su dale,  
Bog im je reko:  
Jednu ruku skrij!*



- Niki meštri bili su strogi.  
Ako je kuo učini čo ča ne vajo, vajalo je da  
kleči na soli ili frmentunu, a mogo je dobit i  
palicon.

*\*MOJA MEŠTROVICA*

*Moja meštrovica je  
uvik imala  
našminkono justa.  
I trajnu.*

*Nosila je veštit  
na kocke  
vele, crvene.  
I buoršu, lakironu, sjajnu.*

*Lipa je bila,  
ma, nison je volila  
kad bi u razred  
palicu donila.*



- Jedna je molo bila zla u skuli, po je  
meštrovica poslala doma, da dovede mater.  
Molo se vrotila bez matere i rekla meštrovici:

„ Rekla van je moja mater da je ni doma.“

- Ocjena iz vladanja bila je vrlo stvar. Ali mi smo bili vragometni, po smo znali  
svašta skrojiti.



- Kal san se pričesti, kupila mi mater  
marinierski veštiti. Dola mi je da ga ubučen posli  
i za u skulu. Ali jedon moli u skuli stavi katron  
na moju katridu, a jo se ne obado. I kako san  
sedi, stepli se katron i raskrovi meni po veštiti!  
Da sposin veštiti, provo san ga oprat benzinon...  
i tek onda učini posol!

- I jo san dobro zapontila svoju prvu pričest.

Onda nismo imali svi iste bile vešte, ko vi danas, nego se svak snalazi kako je  
mogo i zno.

Moja mater ni muogla kupit novu veštu, po je vajalo obuć jednu ča non je poslala  
rodica iz Amerike.

Sve bi bilo dobro da vešta ni bila ruožasta i da meni  
ni vajalo stot u prvien riedu...

I tako, jo san van siguro prvo i zojno koju se  
pričiestila u ruožaston vešti.

Don danas moje prijatejice znodu pitat jedna drugu:

Je se spominješ kako je na pričesti Marija bila u  
ruožaston vešti, u prvien riedu?



**\*VOZILA SE BARKA**

*Vozila se barka,  
na svetoga Marka,  
puna nakrcana  
svile i bumbaka*

*Svilu ćemo prodati,  
bumbak ćemo otkati,  
malon Mari suknjicu,  
da pokrije guzicu.*



- U ono doba dohodili paketi sa nošenon robon iz Amerik i onda to prodovali.

Otac mi je ti kupit jaketu i za nju mu je vajalo izdilot četiri grezo praga.

Cili sritan reko mi je: „Evo sinko, obuc je kad ideš u crikvu!“

A ti don dažilo, ko iz kabla. Nasupola se jaketa. I čo sal?

Išo jo u Franie Peka osušit jaketu. Stavi je priko bačve, blizu peći.

Ali kad je uon otvori vrotu ol peći, rasplamso se ogonj i čapo jaketu!

Ostali rukovi i škina, a pridnjice ninder!

Odni jo jadan jaketu doma i ostavi je u konobi da je ne vididu mater i otac.

Čin me vidila, mater me pitala: „A di ti je jaketa? Dones je, sinko, osušit.“

Jo san na to somo reko: „Ni potriba, mâ, osušena je!“

*Puše bura iza kuće,  
teško dici bez obuće!*



- Moja Lena, od ovoga tvojega maloga nikad ništa!

- Nemuojte tako šjor Jure. Ne gledojte ga sada.

Još je sirovo dite. Čekojte da se učini u čovika!



IMOJTE PACIJENCE!

DOJTE NAN RUKU!

I MI ĆEMO POSTAT JUDI!



### SVE PTIČICE IZ GORE

Sve ptičice iz gore  
Spustile se na more.

Samo jedna ostala  
Koja mi je pivala.

Koja mi je pivala  
O nesritnoj ljubavi.

Zbogom ostaj mila ti  
Moramo se rasti.

Nosit ću te u srcu  
Bili cvite ubrani.



*Sjećanja iz starih školskih klupa (prema usmenom kazivanju starijih)  
zapisali, ilustrirali i na sceni probudili:*

*Stipe Bauk*

*Angela Galinović*

*Rania Bratić*

*Nika Ivić*

*Eva Capković*

*Lara Kaštelan*

*Pjero Dragičević*

*Marin Martinić*

*Roza Dragičević*

*Nino Martinić*

*Kristijan Drpić*

*Lena Radić*

*Franko Eterović*

*Vedran Radić*

*Matea Eterović*

*Andi Rajčević*

*Nikolina Eterović*

*Rozarija Špacal*

*Sara Eterović*

*Zoran Vrandečić*

*„Ne da mlado da se staro zaboravi!!“*



*IV. r. OŠ Pučišća  
učiteljica Željka Martinić*

*lipanj 2018.g.*